


S **Afl. 1.25** LO

BRIYANDO FUERTE • TRECIENDO CLARIDAD
DIAHUEBS 28 MAART 2024

Di Pueblo

SOLO SALUD

AZETA UZA DI NOBO POR CAUSA DEMENCIA



WWW.SOLODIPUEBLO.COM



SOLODIPUEBLO@GMAIL.COM

ENTRANTE AUGUSTUS 2024, E ALUMNONAN DI KLAS 1 LO SIÑA LESA Y SKIRBI NA PAPIAMENTO



MINTINO TA ABORDA ABUSO EXTREMO DI MASCOTA CU MANEHO NOBO PA E BIENESTAR DI NOS ANIMALNAN

WARDACOSTA LO BAI HASI CONTROLNAN RIBA LAMA DURANTE SEMANA SANTA CU META PA GARANTISA ORDEN PUBLICO



PROME MINISTER Y MINISTER DI FINANSA TA NA CORSO PA SALVAGUARDIA E POSICION Y E DERECHO DI ASEGURADONAN DI ENNIA ARUBA



POLIS A BAY FAHRENHEIDSTRAAT PA UN YIU CU A LANTA CONTRA SU MAYORNAN



Minister Ursell Arends:

MINTINO TA ABORDA ABUSO EXTREMO DI MASCOTA CU MANEHO NOBO PA E BIENESTAR DI NOS ANIMALNAN

Recientemente bureau MinTINO conhuntamente cu diferente fundacion di rescate y tambe KPA a ricibi informacion di un caso extremo di abuso di animal. E caso aki ta encera un cantidad di cacho di diferente rasa bou condicionnan horroso y simplemente inaceptabel. Nos ta comparti e imagennan di e cacho cu ta esun den condicion mas critico actualmente, despues di a wordo exponi na crueldad y abuso extremo di su mesun doño.

E actonan aki di crueldad y abuso di animal no ta aceptabel, pero e ta sosode sigur tur dia den nos comunidad. Pa es motibo nos ta sali pa dilanti como ministerio encarga cu e bienestar di nos animalnan, cu e caso aki como un ehempel pa informa y demostra na nos comunidad kico ta sosode den cura di cas cu nos mascotanan!

E problema di animal aki na Aruba no ta solamente locual cu hopi hende ta pensa cu ta e cachonan ariba caya, pero e ta encera tambe e abuso y crueldad di animal cu hopi mascota ta sufri den cura di cas y tin biaha sin escape. P'ese nos ta tuma e oportunidad aki pa menciona alabes cu MinTINO ta cla cu nos maneho nobo pa nos animalnan.

Nos Maneho Bienestar di Animal Aruba (MBAA) ta un maneho nobo cu ta enfoca ariba e causa primario di e problematicanan aki cu nos ta mirando den nos comunidad cu ta puramente abuso di nos animalnan. Nos ta bay den e direccion mas preventivo pa asina traha riba tur nivel pa preveni cu e problematica aki ta bay sigui escala fuera di nos control den futuro.

Un di partinan importante di e

maneho nobo ta cu lo bay traha ariba un ley (dierenwelzijn wet) nobo cu ta enfoca pa proteha nos animalnan. E ley aki lo aborda tur e puntonan y problemanan cu nos ta mira actual den comunidad, na e forma corecto cu e reinforcacion debido y structura di parti di nos instancianan di autoridad. Cuminsando cu e caso aki.

E ta sumamente lamentabel pa mira cu ainda den aña 2024, tin hende den nos comunidad cu ta pensa cu abuso di animal ta algo aceptabel. Pero nos kier informa cu esaki no ta asina, cu e cambionan necesario y e sosten di nos stakeholders nos ta bay tuma accion riba diferente nivel pa asina mehora e bienestar di nos animalnan ariba nos isla.

Den mesun cuadro aki, nos ta pidi esnan den nos comunidad pa por favor no keda den silencio ora ta ripara cu abuso di animal ta sosode den bo barío. Meld esaki na bo polis di barío y splica e situacion concretamente pa asina casonan manera esaki por wordo preveni y asta procesa mas lihe cu ta posibel asina scapando bida di nos animalnan cu ta biba den sufrimento. No mester warda ora e situacion bira alarmante, mester actua na e prome señal cu algo ta robes.

E problema aki di animal no ta di Gobierno, e no ta di polis e no ta di un fundacion, e problema aki ta di nos tur cu ta biba aki na Aruba y ta nos mes tin cu scoge pa haci un cambio. E ta cuminsa na abo como ciudadano pa ta alerta y demostra mas empatia pa asina salba nos animalnan cu tambe ta forma parti di nos sociedad.

Ministerio encarga cu dierenwelzijn lo bay publica mas



informacion di nos maneho nobo pa e bienestar di nos animalnan.

Pa cualkier tipo di informacion por favor tuma contacto cu Centro Control di Cacho of CCC. Por haya nan ariba Facebook, of yama bo polis di barío pa raporta si ta ripara caso di abuso di animal.

No keda den silencio y no warda te ora ta mucho lat pa raporta.



De Minister van Onderwijs en Sport is voornemens in het openbaar aan te besteden, het door Land Aruba te financieren project:

“Nieuw te bouwen Juliana School”.

Volgens bestek CAST nr. 023-2024.

Korte omschrijving van het werk:

1. Bouwrijp maken van het terrein;
2. Nieuwbouw schoolgebouw bestaande uit theorie- en practicumlokalen, docentenkamer, toiletgroepen etc.;
3. Nieuwbouw kiosken op de binnenplein;
4. Aanbrengen verharding op de binnenplein en terreinen rondom het schoolgebouw;
5. Nieuwbouw Gymnastiekzaal
6. Aanbrengen van een parkeerplaats;
7. Aanbrengen van afrasteringen.

Uitvoeringstermijn: **240 werkbare werkdagen** na datum van opdrachtbrief, incl. bestellingstijd.

Het bestek is vanaf **28 maart 2024** verkrijgbaar bij het kantoor van CAST N.V. tegen betaling van **Afl. 750,00**.

De betaling te voldoen bij de kassier van CAST N.V.

De openbare bescheiden liggen ter inzage vanaf **28 maart 2024** ten kantore van CAST N.V.

Inlichtingen worden verstrekt op **3 april 2024** om 9.00 uur v.m. te DOW.

De Nota van Inlichtingen wordt vastgesteld op **10 april 2024**.

De openbare aanbesteding vindt plaats op **24 april 2024** om 11.00 uur v.m. op het kantoor van de directeur van de Dienst Openbare Werken.

De inschrijver moet bij zijn inschrijving de volgende vereisten overleggen:

1. Bewijs van inschrijving in het register van de Kamer van Koophandel van Aruba (niet ouder dan 6 maanden).
2. Bereidheidsverklaring tot het instellen van een bankgarantie of borg.
3. De staat van eenheidsprijzen voor verrekening van meer- en minderwerken.
4. Overige vereisten opgenomen in het bestek.

Inschrijving dient te geschieden op het bij het bestek gevoegde en gewaarmerkte inschrijvingsformulier.

WARDACOSTA LO BAI HASI CONTROLNAN RIBA LAMA DURANTE SEMANA SANTA CU META PA GARANTISA ORDEN PUBLICO

Wardacosta ta informa doñonan di boto y seadoo pa tene cuenta pa nan tin nan documentonan valido a bordo cual ta, 'vaarvergunning' y 'vaarbewijs' di e capitán. Zorg pa tin vest di salbabida pa tur tripulacion y pasahero abordo; no por bai ku dimas pasahero abordo di e boto pa evita situacion peligroso.

Importante tambe pa informa famia unda bo ta bai cu bo boto, pa na momento cu un situacion peligroso presenta, famia sa unda bo ta i asina por informa Wardacosta debidamente. Ta bon pa

botonan tin un lifering y importante pa botonan tin nan anker ku suficiente cabuya a bordo.

Wardacosta lo tey presente cu diferente di su botonan nan durante Semana Santa riba lama pa por hasi e parti di vigilancia y brinda seguridat maritimo. Vigilancia riba cuida di naturalesa tambe ta parti di control di Wardacosta.

Area nan cual Wardacosta lo vigila ta San Nicolasbaai - Commandeursbaai, Barcadera haven/ lagoen, Spaans Lagoen, High rise Hotel-Arashi-Lighthouse, Rincon, diferente Rif, Baby Beach y Eagle Beach.



Wardacosta ta avisa tur doño di boto pa laga hasi mantencion na nan boto. Zorg pa bo tin suficiente medionan di seguridat y ekipo di rescate na bordo, manera: zwemvest, EHBO

kit, suficiente awa, aparato pa paga candela, radio VHF of telefon celular ku bateria full carga. Asina por minimalisa e chens cu bo boto ta dañá na caminda y cubo haña bo

den un situacion peligroso riba lama cu bo boto y bo pasaheronan. Den caso cu bo mester di yudansa, bo por yama Wardacosta riba e number 913 of Whatsapp 005999 510 0913.

CONSEHO HUBENIL DI 131 A BISHITA PARLAMENTO DI ARUBA

Desde 2019 131 a incorpora un Consejo Hubenil den nan organisacion. E Consejo Hubenil di 131 su tarea ta pa primeramente duna conseho solicita y no solicita na e organisacion. Tambe nan ta duna conseho ariba proyectonan di 131, prome cu nan ser implementa. E Consejo Hubenil di 131 ta duna e organisacion un bista cu precision di kiko ta pasando bao di mucha y hoben y pakiko.

E Consejo Hubenil ta consisti di 5 hoben, mucha muher y mucha homber, entre e edad nan di 11 pa 24 aña. E personal di 131 ta den contacto estrecho cu e Consejo Hubenil pa asina aki por scucha kiko segun

nan ta e preocupacionan y problemanan bao di nos muchanan y hobenan.

Ariba 28 di febrauri ultimo e Consejo Hubenil a haci un bishita na Parlamento di Aruba. Durante e bishita nan a participa den un reunion cu diferente parlamentarianan. Durante e reunion tawata presente e fraccionan di Raiz, Mep, Mas, Accion 21, Parlamentario Independiente Gerlien Croes y Avp. Durante e reunion e director di 131 a duna informacion tocante e tarea di e Consejo Hubenil, y a contesta diferente pregunta di diferente parlamentario encuanto e Consejo Hubenil, 131 y desaroyo y problemanan

bao di e muchanan y hobenan na Aruba. Tambe e miembronan di e Consejo Hubenil a presenta diferente desaroyo y inquietud bao di nos muchanan y hobenan di Aruba, a haci diferente pregunta na e parlamentarionan y a contesta diferente di nan preguntanan.


131 y e Consejo Hubenil di 131 kier a gradici Parlamento di Aruba pa ricibi nos y pa e momento di intercambio durante e reunion.

Pa mas informacion tocante e Consejo Hubenil di 131 por tuma contacto via nos website: 131.aw, Instagram: Instagram:



131aruba, facebook: 131aruba@gmail.com of
<https://www.facebook.com/aruba.131>, email: telefon 5886138/ 5884011.

Minister Endy Croes: ENTRANTE AUGUSTUS 2024, E ALUMNONAN DI KLAS 1 LO SIÑA LESA Y SKIRBI NA PAPIAMENTO



Diaranson mainta durante Conferencia di Prensa di Gobierno di Aruba, Minister Endy Croes a anuncia e maneho di idioma nobo pa proximo aña escolar. Pues desde aña escolar 2024-2025, e alumnonan di klas 1 di scol basico lo siña lesa y skirbi na Papiamento. Lo duna Hulandes como materia y acopla na loke e mucha por den Papiamento. E maneho di idioma ta basa riba recomendacion 2 di e rapport Doorlichting van het Arubaanse Onderwijsstelsel: elegi un maneho di idioma concreto y consecuente (maak een eenduidige en consequente keuze in het taalbeleid). A base di esaki, a pidi e expertonan di Departamento di Enseñansa (DEA) pa haci un investigacion profundo riba e tema aki, den forma di un debate nacional hunto cu diferente experto y stakeholder den enseñansa

y afo di enseñansa. E discusion pa scoge e ley di maneho di idioma pa Aruba a inicia desde aña 1819, pues 205 aña pasa. Na aña 1819, Gobernado General Sr. Albert Kikkert a enfatisa cu mal dominio di e idioma Hulandes tin efecto negativo riba otro materia y pa tin Hulandes como e unico idioma di instruccion no ta e forma mas adecua pa enseñansa na Aruba. Algun aña despues, Sr. Hamelberg y Sr. van Kol a ripiti esaki. E problema ta sinta na momento cu e muchanan sali di scol preparatorio y cuminsa scol basico, paso, ta haci mane e muchanan tin un vocabulario basico di 6000 palabra na Hulandes, cual ta totalmente eroneo. Segun rapport di CBS den 80% Papiamento ta e idioma mas papia na cas. Banda di esaki, den 28% di e hogarnan nan Aruba, Spaño ta e idioma mas papia. Den caso di Ingles

ta 16 % y den caso di Hulandes ta trata di 13%. Cu e base fuerte di e idioma Papiamento, e muchanan por siña e otro idioma nan di un forma hopi mas efectivo.

A forma un comision di diferente experto; Sra. Vanessa Scholing - Pietersz, Sra. Audrey Tromp - Wouters y Sr. Juan Maduro cu a studia e rapportnan existente y a tene diferente sesion di consulta y a haci e investigacionnan pa por presenta un rapport y conseho final na e mandatario di Enseñansa. E comision a repasa tur “beleidsnota” existente riba maneho di idioma: Habri Porta pa nos Drenta (2002), Adviesnota verlongde Schooldag (2009), Implementatieplan kerndoelen primair onderwijs (2015), Nota diversificacion idioma di instruccion (2016), Kerndoelen Primair Onderwijs (2017), Nationaal Beleid Beroepsonderwijs Aruba (2018), Nationaal Onderwijs Plan Aruba en Plan Educacion Nacional Aruba 2030 (2019), Een nieuw traject in het AVO (2019), Examens in het Nederlands voor AVO leerlingen (2019) y Deelbeleid Structuren, Processen en Randvoorwaarden voor het Arubaanse Beroepsonderwijs (2021). Tambe a tuma den consideracion e estudionan internacional di entre otro, rapport di UNESCO di aña 2016, Global Education



Monitoring Policy Paper, “If you do not understand, how can you learn?” y rapport di World Bank di aña 2021 titula: “Effective Language of Instruction Policies for Learning”. Tur nota y rapport di e ultimo 200 aña ta ilustra e problematica di idioma di instruccion cu no ta cuadra cu e situacion di idioma y ni e contexto di Aruba. E maneho di idioma actual no ta funciona y ta duna un rendimiento hopi abou pa nos alumnonan. Banda di e investigacionnan, a haci inventarisacion di kico tur mester haci pa por logra introduci un maneho nobo di idioma. Pues, a inventarisa e materialnan cu tin y e materialnan cu mester traha pa asina por haci introduccion di e maneho nobo di idioma corectamente. A inverti alrededor di 1.2 mion florin pa por realiza tur e materialnan aki na tempo pa augustus

proximo. Banda di esaki, a inventarisa e leyman, pa evalua, si e ley ta permiti e introduccion aki, cual ta ok y duna training na tur maestro di klas 1 hunto cu tur cabesante di scol basico na Aruba. Nan ta haya 6 dia di estudio durante e trayecto di preparacion cu a inicia november 2023 y lo culmina na mei 2024. Siña den idioma materno Papiamento lo beneficia e mucha den su proceso di siñamento, desaroyo di inteligencia emocional y habilidadnan critico di pensamiento. Ademas di esaki, nan por conecta miho cu nan raisnan cultural. Pa finalisa, e maneho nobo di idioma lo ta sumamente beneficioso pa nos muchanan di Aruba. Nos muchanan lo sinti mas confia y sigur den nan proceso di siñamento, pasobra esaki ta alinia cu loke nan sa caba. Pues, e ta alinia na nan idioma materno y nan cultura.

DISCURSO DI MINISTER DI CULTURA NA OCASION DI E CELEBRACION DI DIA MUNDIAL DI TEATRO RIBA 27 DI MAART 2024



Un bonnochi cordial na tur presente,

Ta un placer pa awe na vispera di Dia Mundial di Teatro dedica algun palabra na tur instancia y persona cu ta haci e arte di teatro posibel.

E arte di Teatro tin e don pa laga nos brasa nos diferencia y laga nos sinti nos forza universal.

Teatro ta un medio di comunicacion, expresion y entretenimiento importante pa transmiti y fomenta paz.

Ta danki na e esfuerzo di cada artista y atraves di nan creatividad, nan ta recorda nos di nos bunitesa como ser humano unico y alaves diferente cu asina nos subi tarima den arte nos ta uni den un forza universal cu ta trece paz den nos curason y trankilidad den nos mente.

E mensahe di e aña aki ta den man di e escritor y dramaturgo Jon Fosse di

Norwega cu ta splica na un manera bunita cu aunque tur hende ta unico, nos tur ta mescos. No ta importa nos color, nos fashi, e pais na unda nos a nace, nos religion etc, den nos ser nos tur ta mescos.

Na Aruba ta 20 aña caba cu nos ta para keto pa celebra e hecho cu e arte di teatro ta bibo na nos Pais. E ta forma parti di nos cultura y pa e motibo aki ta importante pa e por ricibi nos sosten y apoyo. Den esaki ta crucial pa den comunidad mas hende wordo haci consciente di e importancia di e forma di arte aki y nos mester busca mas avenida pa crea e sosten cu ta necesario pa e arte di teatro keda florece pa eternidad.

Den cuadro di e trabounan pa introduci Educacion Cultural na scol, nos ta sondea con pa apoya e arte di teatro na miho manera. A tene ronda di consulta pa asina ta bon informa di e deseonan pa asina por yega na solucion cu ta wordo

carga pa e comunidad di teatro na nos Pais. Pues nos ta riba dje.

Pa finalisa mi kier gradici tur persona y instancia cu ta dedica na duna

bida na e arte di teatro na Aruba. Ban admira, aplaudi y brinda sosten na nos talentonan local cu ta domina e arte di teatro na Aruba. Masha danki y pabien di awe caba cu e

celebracion di Dia Mundial di Teatro.

Please no lubida, cu teatro tin e don pa laga nos brasa nos diferencia y laga nos sinti nos forza universal.

CAREER SPOTLIGHT

BY AHATA

THEN

2001
Apprenticeship Cook Student
EPI

NOW

2019 - Present
Co-owner, Executive Chef, and Food & Beverage Director
Infini Restaurant

URVIN CROES

Parlamentario Marco Berlis, parti 1:

GOBIERNO A DECRETA LUNA DI APRIL COMO LUNA NACIONAL CONTRA ABUSO DI MUCHA

Diluna 25 di Maart den un conferencia di prensa gobierno a decreta e luna di April como e "luna nacional contra abuso di mucha." E decreto importante aki ta marca otro decision importante di gobierno riba e tema delicado aki. Conscientisacion y brinda informacion continuamente na pueblo ta importante pa preveni mas caso sucede. Abuso di mucha ta causa trauma y dañonan inmenso na muchanan, e famia y nos comunidad. Aunke gobierno a tuma varios paso concreto pa acapara cu e situacion, estudionan ta muestra cu 99% di casonan di abuso sexual di mucha ta door di un miembro of conocir di e famia. Esaki ta haci cu nos como mayornan mester informa y papia mas cu nos yiunan y ekipanan con pa evita y salba nan curpa den caso di un intento di abuso sexual. Mirando e importancia y urgencia, gobierno a dicidi pa decreta e luna di April e luna nacional contra e abuso di mucha.

Accion clave contra abuso di mucha Gabinete Wever-Croes I y II, a bin ta trahando constantemente riba

ley- y proceduranan pa percura pa castigo mas severo p'e abusadonan. Esaki a wordo logra na Juni 2020. Inmediatamente for di 2017-2024 por bisa cu a logra lo siguiente:

- A institui un Comision Nacional di Abuso di Menor;
- Bureau Sostenemi a bira Advies en Meldpunt Kindermishandeling (AMK) na 2019 y gobierno a institui un comision "Sexueel Misbruik Minderjarigen" bou liderasgo di sra. Lisette Gomez, un persona dedica na e lucha contra abuso sexual di mucha;
- A introduci varios ley pa proteccion di muchanan: Ley di creche, ley di proteccion di mucha y hoben, ouderenplan;
- A inaugura Centro pa Hoben y Famia na 2020 pa yuda mayornan fortalece nan "parenting skills";
- A institui na 2021 e Departamento di Mucha y Hoben;
- A introduci FACT-team Kind en Jeugd di Sociaal Psychiatrische Dienst;
- A expande crisis opvang plekken na Fundacion Contra

Violencia Relacional;

- Stichting Reclassering a establece su departamento di Jeugd reclassering.

Otro iniciativanan di Gobierno pa combati abuso di mucha

Asina tambe gobierno a introduci diferente otro cosnan pa yuda combati e problematica di abuso di mucha manera;

- A introduci un Meldcode, Codigo di Proteccion, y un curso di "Signs of Safety" pa profesionalnan den sectornan social, enseñansa, salud publico y husticia; pa asina tur profesional por raporta na forma uniforme y pa tur informacion relaciona cu e mucha ta central den un solo sistema.
- Family Justice Center, cursonan pa henter e veld social door di European Family Justice Alliance.
- Campaña nacional di "Mi Mesun Heroe:" un proyecto di 52 episodio educativo pa nos muchanan, pa conscientisa e muchanan desde chikito kico por, kico no por, y kico pa haci pa stop actuacionnan no permiti contra un



mucha.

Di e forma aki mi a menciona algun di e cosnan cu gobierno a bin ta haci pa preveni y yuda cu e problematica di abuso sexual y abuso engeneral di mucha. Den mi siguiente articulo mi lo elabora hopi mas riba tur e otro logronan di gobierno den e area aki.

Si pueblo desea mas informacion di e articulo aki, contact mi na tel: 528-4639 of email mi na: marco.berlis@parlamento.aw / Bo parlamentario y sirbidor di pueblo na bo ordo semper!

SETAR N.V. A LOGRA RECERTIFICA PA E ISO/IEC 27001 VERSION NOBO 2022

Den e ultimo lunanan SETAR tabata prepara pa recertifica SETAR pa e standard di ISO/IEC 27001. ISO/IEC 27001 ta un standard internacional cu ta prescribi 'best practices' pa forma un Information Security Management System (ISMS) dentro di un compania. E standard internacional ta basa riba un set di medidanan conforme e standardnan di ISO 27001 cual companianan ta uza pa proteha e seguridad di informacion.

Na luna di januari SETAR a haya

bishita di dos auditors di DNV for di Hulanda, unda cu nan a verifica e compromiso di henter e compania riba e ISO 27001 standard, comprendimento di e ISMS, e metodo cu e departamento ta aplica e medidanan (cual ta scirbi den e policy y standards) den nan proceso, y evalua e efectividad di SETAR su ISMS.

Na aña 2021 SETAR a certifica pa prome biaha pa e ISO/IEC 27001 version 2013, cual tin un validez di tres aña, esey nifica cu e lo a vence e aña aki na maart 2024.



Esaki tabata net bon momento pa recertifica SETAR na e version nobo cual a wordo introduci door di e organo internacional na oktober 2022.

Cu e certificacion di ISO/IEC 27001:2022, SETAR por demonstra na su clientenan, partnernan y suppliers cu nos ta conserva e confidencialidad,

integridad y disponibilidad di informacion. Y tambe SETAR tin e intencion di continuamente mehora procesonan interno y maneha 'best practices' internacional. Despues di a logra establece y implementa un ISMS exitosamente, awo padilanti SETAR kier sigui mantene y mehora continuamente e ISMS.

Minister Dangui Oduber

MINISTER DI TURISMO A BISHITA ARUBA BOUTIQUE AND ART HOTEL DEN CURASON DI PALM BEACH



– Diahuebs 14 di maart, Minister di Turismo y Salud Publico Sr. Dangui Oduber a ricibi un invitacion pa bishita Aruba Boutique and Art Hotel cu lo habri nan porta dia 1 di April 2024. Un boutique hotel nobo den curason di Palm Beach cu lo forma parti como miembro di e marca Best Western Signature Collection.

Minister Oduber a ricibi un recorrido unda e la keda encanta cu e concepto di boutique hotel di arte. Un concepto cu un experiencia cultural y unda e hotel lo ofrece servicio personalisa pa cada bishitante. E boutique hotel lo tin un galeria visual cu coleccionan impresionante di artesanonan local. For di e lobby te na e cuartonan di huesped, cada area di Aruba Boutique and Art Hotel ta decora cuidadosamente pa inspira y fascina. Esaki ta e prome di su clase na Aruba, no solamente e hotel lo tin un galeria di arte unda bishitantenan por compra arte, pero tambe lo experiencia arte durante

nan estadia completo.

E boutique hotel aki ta sirbi como un ehempel di mercado “niche” cu ta enfoka ariba e bishitante cu ta busca un experiencia unico y intimo y cu ta amante di arte. Loke ta haci Aruba Boutique and Art Hotel diferente ta cu nan tin 38 camber, galeria di arte, piscina y jacuzzi cu luz, mini-mercado, concierge virtual, shuttle pa lama, ta inclui buffet pa desayuno, y un restaurant riba tereno habri pa desayuno, lunch y cena. Serca di e boutique hotel tin un restaurant nobo cu lo habri nan portanan pa nos localnan y turistanan cu yama “Omundo” y lo comparti



den su cumindanan un refleho di e compromiso di creatividad culinario y arte cu platonan conoci manera “streetfood”. Minister Dangui Oduber a termina e mainta yamando danki na e partnersnan, staff y personal pa un

mainta hopi ameno. Minister ta expresa su gratitud pe recorrido di e propiedad y ta desea Aruba Boutique and Art Hotel tur tipo di exito cu nan apertura y nan confianza pa introduci un concepto nobo pa Aruba.

Parlamentario Hendrik Tevreden:

FRACCION DI MEP TA SIGUI CU E DIALOGO PA LOCUAL TA E TRATAMENTO DI LEY DI MATRIMONIO DI MESUN SEXO

*Ta bay yega e turno pa e ley wordo trata den Parlamento

Aruba 27 Maart 2024: Parlamentario di Fraccion di MEP, Hendrik Tevreden a duna un bista riba e un di e procesonan cu tin andando na e momentonan aki den Parlamento. El a referi na e ley di matrimonio di mesun sexo y a indica cu e ley aki tin dos punto importante. Tin un ley di iniciativa den Parlamento, pero tambe tin un ley unda cu Fundacion Orguyo ta bringando nan caso den Corte, mientras cu e caso ta den casacion. Tevreden a señala cu na cuminsamento di aña, e advies pa loke ta casacion a sali adelanta. Ta premirando cu e veredicto final di casacion tambe lo sali adelanta.

Sin embargo, tin un proceso cu tambe ta andando den Parlamento, caminda e iniciativa di ley di matrimonio di mesun por wordo pasa den Parlamento.

Ta trata akinan di dos trayectoria diferente cu ta andando y mester atende cu tur dos, a remarca.

E parlamentario a referi cu ambos proceso ta importante. Pesey cartanan a bay pa diferente instancia comparti nan pensamiento riba e tematica aki y nos ta complimenta e proceso cu a wordo bon atendi pa Presidente di Parlamento, kende a bin ta haciendo un tremendo trabao pa atende cu tur ley atrasa, leynan

nobo y sigur lo atende cu e ley aki tambe pa e wordo yama.

Tin un lista di ley riba agenda di parlamento cu tin cu keda trata y e ley aki tambe ta un di nan cu ta bay wordo trata, pesey tur e conmocion y desconfiansa rond di esaki no tabata necesario mes.

"Nos di Fraccion di MEP a scoge pa nos continua na mesa cu Raiz pa locual ta e dialogo riba e tratamiento di e ley aki. No tin necesidad di atende e tipo di asuntonan aki den prensa. Nos a scoge pa sigui e proceso indica y nos lo cumpli cu esaki tambe", Tevreden a expresa.

Esaki ta e miho manera na



mi opinion pa atende cu un ley cu ta asina sensitivo y delicado, cu por trece division den nos comunidad si no anda cu sabiduria cu ne. Pero mi ta bolbe ripiti, cu e ley ta bay yega na turno pa tambe wordo trata manera tur otro ley cu ta drenta parlamento, asina Parlamentario Hendrik Tevreden a finalisa bisando.

MINISTER ENDY CROES TA FELICITA E GANADONAN DI E FERIA DI HIMNO Y BANDERA



conta cu presencia di hues internacional dr. Maria Consuelo Villamizar di Colombia y Sr. Juan Zuleta di Aruba.

Na final di e competencia Minister Endy Croes a haci entrega di medaya na e ganadonan. E hobennan ta preparando pa e Mundial di Confepaso 2024 cu lo tuma luga den luna di juli na Puerto Rico. Pa conclui, Minister Endy Croes ta felicita directiva di OCA, boluntario - y mayornan cu un exitoso campeonato.



Diadomingo atardi, Minister Endy Croes

acompañá pa su kerida esposa Dilailah Croes – Odor a atende e Feria di Himno y Bandera organisa pa Organizacion Caballista Arubano (OCA). E feria a inicia diasabra cu competencia di cabay den tur modalidad y diadomingo e mucha- y hobennan a competi den e competencia di jinete y amazona. Un total di 23 participante a competi den fin di siman. Un tremendo actividad deportivo cu a

Pabien na e ganadonan cu deseo, disciplina, determinacion y dedicacion boso a logra. Alabes, e mandatario di Deporte ta deseanan hopi exito cu nan preparacion pa e mundial na Puerto Rico.



Prome Minister Evelyn Wever-Croes:

PROME MINISTER Y MINISTER DI FINANSA TA NA CORSO PA SALVAGUARDIA E POSICION Y E DERECHO DI ASEGURADONAN DI ENNIA ARUBA

Diaranson mainta 27 di maart Prome Minister Evelyn Wever-Croes hunto cu colega Minister di Finansa Xiomara Maduro a biaha pa Corsou pa reunionan importante den cuadro di e tema di ENNIA.

Manera ta conoci, ENNIA ta un compania cu tin un trayectoria basta largo na pais Aruba y ta conta cu hopi aseguradonan. Mirando cu Corsou y Hulanda ta yegando na un

acuerdo pa loke ta trata e tema di ENNIA na Corsou y Sint Maarten, Prome Minister Evelyn Wever-Croes y colega Minister di Finansa Xiomara Maduro ta na Corsou pa salvaguardia tambe e posicion y e derecho di e aseguradonan di Aruba. Prome Minister y Minister Xiomara lo reuni entre otro cu Prome Minister di Corsou, Minister di Finansa di Corsou y Banco Central di Corsou.



Ocupacion di cama ta na 96,6%

HOSPITAL CU CIFRA MENSUAL PA LUNA DI FEBRUARI 2024

Den cuadro di transparencia y informacion nos di Horacio Oduber Hospital ta comparti cu bos e cifranan pa loke ta luna di februari 2024. Como Hospital ta importante y alabes interesante pa duna comunidad di Aruba un indicacion di cuanto pashent Hospital ta atende mensualmente, cuanto operacion ta tuma luga, pero tambe cuanto baby a nace durante luna, cuanto pashent a regresa cas despues di admision y mas.


Na februari a hospitalisa 811 pashent cual ta menos

compara cu na januari cu tabata 882 pashent. Durante admision e pashent a keda un promedio di 4,3 dia den HOH na Lunda di februari. E ocupacion di cama na januari tabata alarmante y na februari ela baha, aunke ainda halto, esta 96,6%. Un total di 551 pashent a wordo opera na februari cual ta 11 operacion mas cu na luna di januari.

Departamento di Emergencia a mira na januari un total di 2953 pashent y na februari 2806 pashent di cual 43,2% no tabata pashent cu tabata rekeri cuido di emergenciam.

A nace un total di 71 baby durante luna di februari di cual 37 ta mucha homber y 34 ta mucha muhe. Y na februari Bloedbank Aruba a ricibi un total di 191 donacion di sanger.

Specialistanan den servicio di Hospital a haci un total di 6355 consulta cu pashent y Departamento di radiologia a haci un total di 4647 test manera CT scan, MRI y mas. Un total di 11568 persona a bishita LABHOH pa haci nan test cual ta poco mas abou cu na januari cu tabata 12272. Y na februari un total di 806 pashent a sali for di Hospital y regresa nan cas.



Nos di HOH t'ey pa yuda otro di e miho forma posibel cu semper e calidad halto di cuido na prome luga. Danki na tur colega di

HOH pa bos dedicacion, pasion y determinacion pa brinda cuido excelente na e comunidad di Aruba y tur bishitante.

Prome Minister Evelyn Wever-Croes:

En conexion cu luna Nacional di Conscientisacion Contra Abuso di Mucha, DIRECTORA DI BUREAU SOSTENEMI A MUSTRA RIBA E IMPORTANCIA PA SCUCHA NOS MUCHANAN

Dialuna mainta durante Conferencia di Prensa di Gobierno di Aruba a hiba palabra directora di Bureau Sostenemi (BSO), señora Magaly Maduro. Esaki en conexion cu luna di April cu a wordo decreta pa Gobierno di Aruba como e luna Nacional di Conscientisacion contra Abuso di Mucha.

Desde aña 2019, Bureau Sostenemi ta e punto central, e asina yama Advies y Meldpunt (AMK), pa raporta maltrato di mucha. Durante e conferencia di prensa señora Magaly Maduro a menciona cu como directora di Bureau Sostenemi e ta sumamente complaci cu luna di april a wordo decreta como e luna contra abuso di mucha y asina mas atencion lo wordo poni

riba e problematica aki. El a indica cu na Bureau Sostenemi nan ta mira solamente un parti chikito di e problema aki, principalmente e abuso emocional pero tambe e negligencia emocional cual ta un di e motibonan cu e muchanan ta bira vulnerabel pa e abuso sexual. Segun cifranan di Bureau Sostenemi, pa aña tin alrededor di 400 caso pero no tur ta trata di maltrato of abuso sexual pero si e dalmento di mucha ta pasa hopi na Aruba y ta wordo normalisa.

Na aña 2023 Bureau Sostenemi a wordo reforsa cu dos trahado social, cual a alivia un poco nan trabou. Señora Maduro ta pone enfasis cu e unico manera pa soluciona e problema aki ta

trahando hunto. Na cas tin hopi cos ta pasa y mester atende cu nan. Ora cu e abuso sexual sosode por wak cu 99% di e casonan ta door di un hende cercano di e mucha y nos como mayor tin e responsabilidad di atende cu esaki.

Un echo hopi importante ta, pa kere den e mucha. Ora un mucha bisabo cu e no kier frecuente cierto persona, of e no kier pa cierto persona wak p'e of e no kier sinta den scochi di cierto persona, mester pone bon atencion na esaki, mester tende di e mucha y busca mas leu e motibo.

No ta na Aruba so e cifra aki ta halto, sino rond henter mundo e traficacion y bendemento di mucha ta halto. Señora Maduro a expresa



di tin speransa cu na Aruba por yega na baha e cifra halto di abuso di mucha. "Si cada persona na Aruba contribui y 'pone su granito di arena' nos por yuda combati e abuso di menor en general", señora Maduro a expresa.

Pa denuncia un caso di abuso di mucha of pa conseho por jama gratis: 588 1010 of email: sostenemi@aruba.gov.aw.

Parlamentario di AVP, Mervin Wyatt-Ras:

Gabinete Wever-Croes II ta sacrificando pueblo pa yena nan sacco



Manera a keda informa pa prensa, tin un situacion di crisis den hospital caminda empleado mester lucha pa nan derecho. Esey a pone parlamentar-

io Mervin Wyatt-Ras activa, kende a bisa di semper ta solidario cu empleado y e beneficio cu mester tin tambe pa salubridad publico. P'esey diamars mainta a compana lider di partido AVP, Mike Eman den un conferencia di prensa pafo di hospital. E parlamentario di oposicion a ripiti e ponencia cu a trece varios siman atras, esta e aumento di 23% den e promedio di indice di mortalidad riba nos isla y cu e ta califica como un indicador alarmante. Y mientras cu parlamentario di coalicion, Setty Christiaans-Yarzagaray ta bagatelisa e echo

argumentando cu ta trata djis di e embebecimento di poblacion y di e indice di malesa cronico, Wyatt Ras ta kere cu e pueblo di Aruba merece miho. Echo ta cu hopi di e situacion aki tin di haber cu e medidanan cu Gabinete Wever-Croes I y II a impone riba nos comunidad. "Hopi ta mishi cu nan salud directamente. Hopi ciudadano no por haya nan medicina na botica pasobra no por paga. Esey ta afectando nos salud awe y mas den futuro," Wyatt-Ras a comenta. Adicionalmente, e aumento di BBO e introduccion di BBO na frontera

a haci di e cumindanan mas saludabel fuera di e alcance di mayoria ciudadano. E consumo di cumindanan mas barata, pero yena cu color y preservativo, ta aporta na e aumento di malesanan cronico. E mesun tin consecuencia riba desaroyo fisico y mental di e hobennan, cu tur su consecuencia socio-economico. Wyatt-Ras: "E gobierno aki no ta mira cu djis pa yena nan sacco, ta sacrificando nos pueblo." Entre e preguntanan cu fraccion di AVP a dirigi na Parlamento di Aruba pa Minister President contesta, ta pidi pa bisa kico ta haciendo den termino di prevencion pa evita cu e indice di mortalidad por sigui subi. AVP kier sa kico e minister di salud ta haciendo pa mehora e acceso oportuno na cuida medico y con ta eliminando e retraso ocasiona pa e pandemia. Otro punto di preocupacion di AVP cu Wyatt-Ras

a menciona ta e dificultad cu tin keto bay pa entidad medico traha cu otro, loke por mehora substancialmente e cuida integral y mayor prevencion cu ta traduci den menos gasto medico. Wyatt-Ras: "Kico gobierno ta bay haci pa preveni cu nos hendenan ta muri na gran escala. Colega ta bisa cu mi ta dramatiza, pero e ta un cifra tangible y nos mester haci algo cu ne. Nos a haci 11 pregunta, te ainda di dia 14 di maart no a haya contesta, pero esey ta e modus operandi." Nos como pais mester para fuerte. Tin un crisis den mundo medico y e ta afecta salud di nos hende y tambe muchanan. E parlamentario di AVP a conclui ratificando su compromiso di duna atencion y seguimiento na e topico. "Nos mester traha riba nos salud y preveni. No ta keda para contra salud di clase y inhusticia den cuida medico."

Celebra Dia di Cero Desperdicio 2024: Hunto nos por reduci desperdicio!

ORANJESTAD - Dia 30 di maart ta Dia Internacional ro Desperdicio (Zero Waste Day). E dia aki ta dedica na eleva conscientisacion riba consumo y produccion responsabel y tambe na reduccion di desperdicio. Directie Natuur en Medio Ambiente (DNM) ta invita comunidad pa join nos den celebracion di e dia importante aki. Esaki ta e di dos biaha cu Nacionnan Uni (UN) ta observa e dia aki como cu ta na 2022 a tuma e decision pa e dia aki ta un dia observa internacionalmente.

E tema pa Dia di Cero Desperdicio 2024 ta pone enfasis riba e necesidad pa reenforza maneho global y e importancia di practicanan di produccion y consumo sostenibel. Desperdicio y polucion di sushedad ta interumpi e ecosistemanan valioso. Tambe, e ta forma un menasa

pa bienestar general di humanidad. Pa ultimo desperdicio por stanca crecimiento economico di un pais, region of nacion.

Na Aruba, nos tin un reto grandi pa enfrenta encuan to e maneho di desperdicio solido. Pero e desperdicio no ta keda solamente na locual hende ta deshaci di dje cu ta di material no biologico, pero e por inclui tambe desperdicio di cuminda. Pues ta importante pa e ser humano cambia su actitud y conducta con ta anda cu desperdicio asina ta evita cu ta deposita desperdicio unda no ta stipula p'e.

Despues cu a cera e stortplaats Parkietenbos, Aruba tin cu custuma cu tin diferente canalnan/ lugarnan, instancianan y negoshinan, cu ta procesa desperdicio cu despues ta haya un utilidad nobo. Mayoria di e lugarnan aki tin un gasto pa de-

posita e desperdicio. Pero tin otro nan cu ta tuma desperdicio ainda gratis. E proceso aki ta locual ta aporta na un economia circular. Con ta por contribui na un Aruba mas limpi?

- **Planea bo compras:** traha un lista di compra y cumpra solamente loke bo mester, cu menos empake posibel.
- **Reduci consumo:** Evita uza productonan cu empaketamento innecesario. Scoge productonan cu por re-usa of recicla.
- **Come consciente:** Planea bo cuminda, conserva loke ta resta di cuminda pa otro dia.
- **Composta desperdicio di cuminda:** Composta desperdicio organico pa crea bon gordura pa bo matanan.
- **Recicla:** Separa bo desperdicio pa recicla segun e instruc-

cionnan di recoleccion.

• **Reuza:** Duna un otro funcion na obhetonan di tur dia. Evita tira nan afo sin considera otro proposito.

Hunto nos por logra un Aruba mas sostenibel!

E meta di un desaroyo sostenibel cu ta directamente asocia y relevante na cero desperdicio ta meta number 12. Pero e no ta keda limita na #12 so, e otro metanan relaciona na topico di Cero Desperdicio ta e metanan SDG# 6, SDG#11, SDG# 13.

DNM ta comprometi na yuda Aruba alcanza un futuro sin desperdicio y un mihor maneho di e desperdicio cu ta na beneficio di tur. Pa mas informacion riba Dia Internacional di Cero Desperdicio por bishita e website: www.unep.org/events/un-day/Internacional-

Lider di AVP, Mike Eman:

Cuido medico ta deteriora bou maneho mentiroso di Gabinete Wever-Croes II



Inmediatamente despues cu a bira conoci e accion cu personal di enfermeria a tene diamars mainta na Dr. Horacio E. Oduber Hospital, lider di Partido di Pueblo Arubano, AVP Mike Eman y colega parlamentario Mervin Wyatt-Ras a mobilisa pa e hospital pa asina manifesta nan solidaridad, pero al-

abes indica con esaki ta un consecuencia mas di e maneho di mentira y medida di e gobierno actual. AVP a scoge pa duna su conferencia semanal for di pafo di e tereno di hospital, pa elabora con e crisis total di Aruba ta refleha den cada area, incluyendo esun medico. E walk out ta forma parti di algo mas grandi; ta e consecuencia di continuo gañamento, segun Eman. “Para pafo di hospitalidad den solidaridad cu enfermero cu ta esforsa nan mes y nos tin respet pa nan.”

El a recorda con algun dia pasa e fraccion di AVP a entrega pregunta den Parlamento tocante e cifra di mortalidad cu ta indica un aumento drastico, especificamente di 23% riba e promedio. Un di e

motibonan tras di esaki ta e tardansa den brinda cuidado specialisa, cu ta empeora door di e conflicto entre personal y maneho di hospital.

Pa ilustra un di e mentiranan mas reciente di Prome Minister Evelyn Wever-Croes, e lider di oposicion a menciona loke e mandatario a bisa recientemente pafo di sede di MEP, esta cu, tocante e topico di ley di matrimonio di mesun sexo, lo bay tene un ‘maatschappelijke consultatie’ cu den tempo di AVP no tabatin. Eman a muestra cu den tempo di AVP tabata tin Dialogo Social cu tur gremio promer cu traha ley y despues cu ley ta cla atrobe e Parlamento cu majoria di AVP tabata consulta.

Eman: “E gañamento di


Evelyne ta causando hopi danjo. Mescos ora el a bisa cu ora e gobierna, e no lo bin cu medida, cu e lo baha edad di pension, y asina mas. Si bo kier, gaña bo casa na cas; no gaña un pueblo completo, no gaña un parlamento, of un Reino Hulandes. Pasobra e gañamento aki ta conduci na e tipo di crisis cu nos tin na e momentonan aki.” Otro ehempel nobo ta ora cu Gabinete Wever-Croes II a bisa cu e 7% di BBO na frontera ta pa proteha comercio local, mientras cu e siman aki Minister di Finanzas, Xiomara Maduro ta anuncia cu a aumenta e suma total na 900 florin di mercancia cu por bin cune di exterior sin paga impuesto. E lider di AVP ta muestra cu claramente esey no ta djis un contradiccion, pero simplemente mas gañamento cu e 7% na frontera tabata pa proteha comercio lokal.

E ta e realidad penoso cu nos pais ta biba aden. P’esey tambe e relato anual di Raad van Advies a indica cu no tin un ley cu Gabinete Wever Croes a bini cune post-Covid cu

ta basa riba e bienestar general. Segun Eman tur Evelyn su leyman ta djis pa ranca placa di e concidano creando un crisis social economico den nos Pais. Mas aleu, tur e gañamento a pone cu awe Hulanda no tin confiansa mas den e palabra di gobierno di Aruba.

E lider di AVP a comparti cu segun e informacion cu nan ta hayando for di sector di cuidado medico, tin lista di espera largo pa mira especialista. Esnan den cuidado a sufri hopi na man di medidanan di Gabinete Wever Croes y e hospital cu AVP a laga den construccion, no tin fin di keda cla. Fuera di esey, cada dia mas especialista ta bandona Aruba y mas enfermero ta kita di hospital pa bay traha na ImSan. E efecto di demoralizacion cu Evelyn ta causando ta visibel tambe serca e hobennan cu no tin un perspectiva y como tal, no tin deseo pa regresa nan isla, Eman a expresa dilanti di hospital compartiendo un preocupacion cu henter nos pueblo ta comparti cune.

Polis a bay panort di Lighthouse pa un hende cu a drenta lama tempran pero no a mire sali mas



Diamars mainta a drenta informe di cu un persona a drenta lama panort di Lighthouse pero no a mir’e sali mas, mesora a dirigi un patruya na e sitio.

Na yegada di e patruya a bin compronde cu aki ta trata di un turista cu a mira un persona aparentemente local a drenta

e lama mainta tempran pero despues no a mir’e sali mas. Polisnan a tira bista rond pero nan tampoco no a mira e persona y a pidi pa e boto di polis yuda tira bista rond pero nan na nan yegada no a mira nada rond. Miando cu e lama ta basta keto no a sigi cu e buskeda mas.

Geoffrey Wever a topa cu grupo di hobennan profesional na Hulanda



Recientemente, Minister Geoffrey Wever a organisa un evento titula "Mix After Six", cual a brinda un oportunidad unico pa in-

teraccion entre e minister y un grupo diverso di studiantenan Arubiano na Hulanda.

Durante e anochi, Minister Wever a logra cera conoci personalmente cu varios studiantenan, y a intercambia den dialogo habri y sincero. E combersacionnan a toca diferente tema, y tambe studiantenan a comparti nan ambicionnan personal y profesional.

Durante e evento Minister Wever tabata tin e honor di por a ricibi un buki titula "Living Rich As A Student In The Netherlands", scibi pa un autor Arubiano Franklin R. Seute, kende tambe terminando su estudio actualmente - un muestra di creatividad y dedicacion cu Franklin a demostra, scibiendo un buki cu informacion valioso pa otro cu ta sigui den e pasonan di studiantenan.

Tin un diversidad di aspiracion y e potencial ta enorme pa e proximo



generacion di lidernan di Aruba. Minister Wever a expresa su gratitud di por a participa den un intercambio asina, destacando cu "ta importante pa scucha y apoya e ambicionnan di e hobennan profesional". E oportunidad pa networking durante "Mix After Six" no tabata limita na entre e studiantenan y e minister solamente, pero tambe entre e studiantenan nan mes, creando

un ambiente colaborativo cu ta yuda forma e futuro lidernan di Aruba.

Minister Wever a comparti un mensahe di agradecimento y motivacion pa e studiantenan, enfatisando cu, los for di e distancia di tempo, Aruba semper lo ta nan cas. E minister ta anima cu nan esfuersonan y contribucionnan lo ta esencial pa e desaroyo continuo di Aruba.

POLIS A BAY FAHRENHEIDSTRAAT PA UN YIU CU A LANTA CONTRA SU MAYORNAN

Diamars mainta a drenta informe di cu un yiu a lanta contra su mayornan na Fahrenheitstraat, mesora a dirigi un patruya na e sitio. Na yegada di e patruya a purba papia cu e yiu pa e respeta su mayornan y cu mientras e ta bao nan dak y supervision e mester sigi nan reglanan.



PUEBLO A HAÑA SU PEN BEK
 Pa kualkier informacion
 solodipueblo@gmail.com
 of
 ☎ 585-9500

Fundacion Lead By Design y CEDE Aruba: Educando hobennan riba tema di amor propio y hiba un estilo di bida saludabel



ORANJESTAD - Mien- trastanto sessionnan di



Fundacion Lead by Design den colaboracion cu CEDE Aruba cu programa di bario LEAD BY DESIGN ta continuando den ‘full force’ ekipando hobennan desaroya den cuidadanon-an exitoso y integral capaz di prospera den cada area di nan bida. Facilita pa un grupo di profesional, cada un experto riba nan tere- no.

Cu fundado y desaroyado principal di e programa Sra. Sharleen Tromp, kende su mes ta un entreno- nado certifica di Gallup Strengths, docente, entreno- nado di personalidad y desaroyo di talento. Den colaboracion cu diferente coach, ta dunando un total di 14 sesion den barionan di Piedra Plat, Santa Cruz y Noord.

Pa luna di maart a ranca sali cu sessionnan titula, “Unlocking the power of Love” (Liberando e poder di amor) y “You are what you eat” (Bo ta loke bo ta come).

Sesion “Unlocking the power of Love” a keda facilita pa psicologa Sabrina Sonensein di Mindful Love Aruba. Durante e sessionnan aki a concien- tisa hobennan e definicion di amor propio y con nos por logra cultiva esaki for di un edad hoben pa asi- na crea un mentalidad di crecemento.

“Mi a forma parti di e coaching di Lead by De- sign pasobra mi ta hay’e hopi importante y neces- ario pa apoya y guia nos ho- bennan den un edad jong den nan jornada di amor

propio. Tempo cu ami ta- bataba hoben nos no tabata papia di pone nos mes na prome lugar, siña otro con nos ta desea di wordo sti- ma, y con pa proteha nos mes di influencianan con- trario. Esaki ta mi granito di santo pa e futuro generacionnan,” Sonensein a remarca.

Tambe programa di bario LEAD BY DESIGN a ofre- ce sesion, titula “You are what you eat” facilita pa coach nutricionista, nutri- cionista di medicina fun- cional y estudiante de Nu- tricion Humana Clínica y dietética, Johanna Stroo.

Durante e sessionnan aki hobennan a siña e efecto y resultadonan di hiba un estilo di bida di consumo saludabel. Un estilo di bida saludabel ta clabe pa preveni enfermedad de- generativo y cronico, cu ta haci esaki un tema cru- cial pa cu e formacion di nos siguiente generacion. Educacion ta e yabi pa un futuro exitoso y si nos siña nos hobennan con pa biba un bida saludabel e lo re- sulta den un mentalidad

prospero, y nos tur tin un rol pa hunga den esaki.

“Comprometi di priori- tisa LEAD BY DESIGN su aporte y rol den cuadro di Sustainable Develop- ment Goals (STG) 3, 4 y 8 — Salud y bienestar | Edu- cacion di calidad | Tra- bou decente y crecimiento economico — a inicia pro- grama di bario LEAD BY DESIGN cu a cuminsa primeramente den bari- onan di Piedra Plat, Santa Cruz y Noord. E programa a cuminsa for di dia 4 di maart 2024 y ta consisti di un total di 14 sesion. Hobennan participante ta core di un edad entre 15 pa 18 aña,” Tromp a elabora.

Participantenan a haya esaki completamente gra- tis, danki na CEDE Aruba y Centro di Barionan en- volvi.

Pa luna di april Fundacion Lead by Design tin otro programa interesante. Pa esnan cu ta desea mas in- formacion di Fundacion Lead by Design nan fu- turo tayernan, por tuma contacto cu e fundacion via +297 733 0377.



PRONOSTICO DI TEMPO

VALIDO TE DIAHUEBS 28 DI MAART 2024,
18:00 ORA

TEMPO:

AWE TARDI Y AWE NOCHI: PARCIALMENTE
NUBLA Y GENERALMENTE SECO
DEN MARDUGA Y MAYAN: PARCIAMENTE
NUBLA CU UN AWACERO PASAJERO

TEMPERATURA MAXIMO 32 GRADO CEL-
SIUS

TEMPERATURA MINIMO 27 GRADO CEL-
SIUS

INDICE DI CALOR (HEAT INDEX) DEN Y
ROND

DI ORANAN DI MERDIA: 33 PA 38 GRADO
CELSIUS

UV INDEX: 12

AVISO/ ALERTA:

TA SUGERI OPERADORNAN DI BOTO
CHIKITO PA BAI CU
CAUTELA NA COSTA DI PARTINAN OOST TE
NOORDWEST
DEBI NA LABADERANAN FOR DI NOORD-
NOORDOOST.

PRONOSTICO DI TEMPO PA PROXIMO 3 DI-
ANAN:

PARCIALMENTE NUBLA, SIN AWACERO DI
IMPORTANCIA.

BIENTO LO TA FOR DI DIRECCION NOORD-
NOORDOOST TE OOST,

ZWAK TE MODERA DEN RAFAGA.
TEMPERATURA (GRADO CELSIUS)

MAX / MIN LO TA: 33 / 27



HOROSCOPO

28 di Maart 2024

Feliz y productivo diahuebs. Awe, faltando un dia pa Bierna Santo, Solo di Pueblo ta presenta bo horoscop pa dia 28 di maart 2024.

Aries
E ambiente familiar ta reboltia. Sea mas cauteloso y prudente cu placa. Nan lo haci bo oferta di trabao. Bo por sufri un desareglo intestinal chikito. Number di suerte: 62, 92, 9.

Tauro
Bienestar y felicidad emocional. Disfruta di e independencia economico cu semper bo a desea. Na trabao, lo bo tin e tendencia na impone meta eleva. Bo organismo ta den un periodo instabil. Number di suerte: 38, 18, 4.

Geminis
Un actitud mas sincero cu bo pareha lo beneficia bo. Cuminsa ya un maneho di

spaar. Percura p'e exito profesional no subi bo cabe. Fisicamente lo bo sinti bo mes super bon. Number di suerte: 28, 35, 7.

Cancer
Awe lo bo pone fin n'e amor ey cu no a aporta bo na nada positivo. Dia di gran confusion economico. Bo trabao por ta na peliger door di bo falta di puntualidad. Keiro den naturalesa lo mehora e estado di bo organismo. Number di suerte: 14, 18, 2.

Leo
Famia lo duna bo alegria grandi. Bo generosidad excesivo lo hunga bo un mal wega. No laga bo palabranan wordo mal interpreta den bo trabao. Lo bo sinti bo mes mho si bo pone un poco humor den bo bida. Number di suerte: 22, 12, 3.

Virgo

Reflexiona riba loke bo mester elimina di bo bida amoroso. Awe lo ta un bon dia pa wega di suerte. Confronta e problema laboral cu tin un tempo ta stobando. Si bo cuida bo mes un poco, lo bo disfruta di un estado fisico excelente. Number di suerte: 87, 93, 4.

Libra
Un amigo ta namorando di bo. Pone bo placa a salvo di e famianan interesa. Lo bo haya apoyo pa logra bo obhetivonan profesional. Si bo laga e depresionnan falso, bo salud lo mehora. Number di suerte: 77, 51, 1.

Scorpio
Gran capacidad pa stima y wordo stima. Prudencia na ora di tuma decision administrativo. Planifica bo trabao pa futuro. Levemente, bo salud lo wordo afecta. Number di suerte: 99, 81, 2.

Polis a hala atencion di chauffeur coriendo auto cu su lusnan paga den Santa Helenastraat



Dialuna ya caba algun polis ta coriendo cu e auton di polis nobo riba caya, dialuna anochi un di e patruyanan nobo

a tuma nota di un auto coriendo cu lusnan paga den Santa Helenastraat, mesora polis a para e auto y a ataende cu e chauffeur.


Segun e chauffeur e ni a nota cu e lusnan di su auto no ta cendi. Polis a hala su atencion y e por a sigi su caminda.

Sagitario
No laga bo mes tenta door di babilon y balora bo relacion actual. Den bo inversionnan bo tin cu actua cu inteligencia. E constelacion na trabao lo wordo restructura y esey lo ta pa lo miho. Uza bo energia sabiamente, lo bo tin mester di dje awe. Number di suerte: 41, 15, 5.

Capricornio
Un romance por start cu un hende poco conoci. Den e aspecto economico lo bo tin un exito increibel. Pa loke ta trata trabao, awa ta bezig ta bolter. Huy di e ambientenan cu por perhudica bo salud. Number di suerte: 55, 57, 3.

Acuario
Controla bo agresividad; e lo daña tur hende cu kier bo bon. Cumpra un spaarport pa bo bay warda loke bo por. E carga di mas di bo trabao lo culmina cu exito. E angustianan cu bo ta keha di dje lo desapare. Number di suerte: 43, 11, 8.

Piscis
Esaki lo ta un momento excelente pa amor. Bo generosidad lo pone bo gana punto cu e otro. Lo surgi obstaculo den bo trabao debi na intransigencia. E cambionan di tempo lo por causa bo neuralgia. Number di suerte: 95, 62, 7.




	7			6				9
6			5				8	
		4				7		
	3				6			
2				5				8
			4				1	
		3				4		
	2				7			3
1				8			2	

8			3					
3					5			
		9	1		4			
	4			8		7		
6								2
		8		2			3	
			7		9	6		
			2					5
					8			4



Azeta uza di nobo por causa demencia

Un ekipo internacional di científico a haya cu e consumo di azeta di cushina uza di nobo por aumenta e riesgo di demencia, segun un comunicado di e Sociedad Mericano di Biokimica y Biologia Molecular.



E resultadonan di su estudio a detecta nivel mas halto di neurodegeneracion cerca djaca cu a consumi azeta pa hasa di cushina reuza compara cu e djacanan cu un dieta normal. Hasa ta un manera comun di preparacion di alimento rond mundo den e cadena di fast-food.

E resultadonan di e estudio tambe ta demostra cu e aumento di neurodegeneracion ta relaciona cu e efectonan di e azeta den e red di comunicacion bidi-

reccional entre e higra, tripa y cerebro y ta hunga un papel crucial den e regulacion di diferente funcion fisiologico y su alteracion a wordo asocia cu trastorno neurologico.

"Hasa den temperatura halto a wordo relaciona cu varios trastorno metabolico, pero no a realisa investigacion a largo plaso riba e influencia di e consumo di azeta pa hasa y su efectonan perhudicial p'e salud," Kathiresan Shanmugam, profesor di e Universidad Central di Tamil

Nadu, India, cu a sostene e estudio, a sostene.

E djacanan cu a consumi e azeta di sesamo of zombloem rekeinta a muestra un mayor stress oxidativo, inflamacion den e higra y daño significativo den e colon.

"Como resultado, e metabolismo di e lipidonan hepatico a altera significativamente y a reduci e transporte di e importante acido vet omega-3 DHA di e cerebro. Esaki, di su banda, a resulta den neurodegeneracion, cu a observa den e histologia cerebral di e djacanan cu a consumi e azeta rekeinta, como tambe den su crianan," Shanmugam a splica.

E científiconan a agrega cu awo tin mester di estudio clinico den humano pa evalua e efectonan dañino di e consumo di alimento hasa, specialmente esunnan elabora cu azeta cu ta wordo uza repetidamente.

E proximo plannan di e ekipo ta premira pa studia e efectonan di e azeta pa hasa den enfermedad neurodegenerativo manera Alzheimer y Parkinson, como tambe den ansiedad, depresion y neuroinflamacion.

Clasificados

SOLODIPUEBLO@GMAIL.COM
CEL. 585 9500

MARAVILLAS DE LA FE

Salud
Suerte - Amor

Aruba: 748-5671
Cartas di tarot

Bo ta sufrí di un malestar cu bo no por cura?
Bo ta victima di bruheria?
Bo plaka no ya jega?
Bo cumpra numbernan y bo no ta gana?
Bo ta bal casino y no puede tur bo plaka?
Bo tin problemanan di amor?
Bo pareja ta gañabo?
Fracaso. Soledad. Malesanan angustia. Mala suerte
Comunica na 748 5671

Paardenbaaistraat 10, Oranjestad, Aruba Tel.: (297) 525 - 7555
www.lottoaruba.com
Resultado : Sorteo 27 Maart 2024 Merdia

CATOCCHI Sorteo # 4222 3967 4641 2497	LOTTO 5 Sorteo # 0 x Jackpot 0 x Match 4+ 0 x Match 4 0 x Afl. 12,00 150.000,-
MULTI X x2 BIG 4 Sorteo # 4222 7014	LOTTO DI DIA Sorteo # 0 x Jackpot 0 x Match 4 0 x Afl. 8,00 66.000,-
MULTI X X2 10FF Sorteo # 2278 1037	MEGA Sorteo # 0 x Jackpot 0 x match 4 0 x Afl. 500,00 0 x Afl. 50,00 0 x Afl. 15,00 310.000,-
ZODIAC Sorteo # 4222 7644 Libra	MEGA Afl. 410.000,-
LUCRY 3 Sorteo # 1096 816	KORSOU Sorteo #
MULTI X X5	

ORACION DI DIA

Un feliz diaranson santo cu hopi bendicion y debocion

"Mi mester anuncia e era di Señor Su gracia." Lucas 4,19


Hesus a bini pa establece Su Reino aki na mundo. Esey tawata Su mision. E tawata ungi cu Spirito di Señor pa anuncia e Bon Noticia na tur esnan pover di spirito y esnan desanima. Tambe E tawata proclama libertad pa esnan cu tawata preso, esclavo di pica y mara na cadena cu bicionan. Hesus a bini tambe pa habri bista di tur esnan ciego spirit almente cu no tawata mira e realidad y a perde speransa. Tur esnan cu ta wordo oprimi y trata inhustamente Hesus a bini pa duna nan e libertad. El a stima nos y a drama Su sanger pa libera nos di nos pica. Hesus kier anuncia e era di Señor Su gracia. E dia cu Señor ta bay muestra pueblo Su bondad. P'esey laga durante e siman santo aki nos keda cu nos bista fiha riba Hesus, Esun cu a sufrí cruelmente y a wordo crucifica pa cada un di nos cumpliendo cu Dios Su Palabra.

Ban must'r'E e amor cu nos tin p'E entregando nos bida na djE y mustrandó e amor di Dios na esnan cu mas tin meter di djE.


Oracion: Tata Celestial laga cu Bo Spirito Santo bin podera di nos y habri nos bista spiritualmente y duna nos e libertad pa proclama Bo reino di amor, paz y husticia.

Amen.

Polis y ambulans a bay cu urgencia na Jaburibari pa un dama di 32 aña cu no por a hala rosea



Na yegada di e patruya a bin compronde cu aki ta trata di un dama di 32 aña cu a choca y no por a hala rosea. Na yegada di e ambulans nan a a atende y yuda e dama hala rosea bek y a recomende pa e bay su dokter di cas.



Diamars mainta tempran a drenta informe di cu tin un dama cu a choca su mes na Jaburibari, mesora a dirigi tanto polis como ambulans na e sitio.

Cu hopi pena, pero conforme cu e boluntad di Dios, nos ta anuncia fayecimento di:

Sra. Rita Bartolomea Winterdaal-van der Biezen

Tanta di nos directora y ruman di nos Project Manager Den pasado nos secretaria.

Cu nos bon Dios tuma nos kerida defunto den su reino y dun'e sosiego eterno.

Condolencia lo tuma lugar diahuebs 28 di Maart 2024, 7 p.m. – 9 p.m. y Acto di entierro ta tuma lugar diasabra 30 di Maart 2024 di 9 a.m. – 11 a.m.

Na Aurora Funeral Home